

Mestreech, stad van verboondeheid

Mestreech is 'n stad boe-in me ziech pak en boe-in alle inwoeners ziech thoes mote kinne veule. Dees ambitie steit en vèlt oonder mie mèt 't versterke vaan de verboondeheid. 't Verbeterere vaan die verboondeheid zuut de nui coalitie vaan Seniorepartij Mestreech, D66, CDA, PvdA, PVM, VVD en Volt es 'n urgente opdrach veur de koumende veer jaor.

Veer wèrke daorum aon de verboondeheid *in* de stad tösse alle inwoners van Mestreech, de verboondeheid *mèt* de stad die 'n thoes is veur al häör inwoeners en de verboondeheid *vaan* de stad mèt häör partners en de (Eu)regio.

Hiel belaankriek daobij is tot de inwoeners vaan Mestreech ervare tot zie kinne agendere, kinne mètdinke en ouch kinne mètbepaole euver de onderwerpe die speule in de buurt, de wiek, de stad en de (Eu)regio. Dao is groete behoefte aon. Dit vreug vaan us neet allein realistische ambities, meh ouch um aanpassingsvermoge: de wèl en krach um (zelf) te verandere. In 'nen tied vaan diverse internationaal crises is die krach um te verandere mesjiens wel noedzakeleker es oets.

In vööl opziechte klop 't beeld vaan Mestreech wat me krijg es me vaan boeteaof nao de stad loert: 'n bleujende internationaal studentestad in 'n dynamische kinneregio, boe 't good woene en verblieve is. Dit bringk de stad vööl en beujt nog vööl kanse veur wijer versterking. Tegelijkertied bringk dit speciaal verantwoordelekhede mèt ziech mèt, in de riehting vaan eus (Eu)regio, meh ouch nao eus inwoeners.

Veer vinde tot 't hoeg tied is um dees verantwoordelekhede actiever en concreter vörm te geve. In de Mestreechse sameleving dreig mèt naome de twiedeiling 'n ummertouw prominenter kinmerk te weure. Die twiedeiling löp langs vööl lijne: tösse de oersprunkeleke en nui bewoeners, tösse blievers en passante, tösse taolgróppe, tösse wieke en langs landsgrenze (in 't bezunder veur grenswèrkers), meh zeker ouch tösse riekdom en ermooj. De sjeidslijn tösse riek en erm en de sjöldeproblematiek die daobij ummertouw dèkser optrejt, is 'n zörg veur 'ne greujende gróp Mestreechtenere, ouch in de middestand en in de middegróp in eus stad. Dit is e risico veur de touwkoms vaan de stad.

Veer oonderkinne 't risico en starte 'n tegebeweging. Ouch umtot de pries die de stad betaolt veur dees twiedeiling ummertouw wijer oplöp. Neet allein op 't gebeed vaan financies en de geluifweerdigheid vaan bestuur en beleid, meh veural op 't welzien en de gezondheid vaan vööl inwoeners. Inwoeners rekene jammers op e stadsbestuur wat besjerm wat weerdevol en kwetsbaar is. Zie zien dat soms onvoldoende trök. Eus missie begint hei: bij 't erkinne vaan 't risico vaan de sjeidslijn in de stad. Dat begin is belaankriek, meh ouch neet mie es dat, naomelek e begin. Dao ech get aon doen, mèt concrete planne en acties, vereis 'ne blik dee wijer reik es de veurligkende bestuursperiode 2022-2026. Veer höbbe veur ouge um daorum allebei te doen: concrete acties beneume veur de koumende bestuursperiode én de langetermienambities sjetse boe-in die acties passe, zoewie in de recent door de gemeinteraod vasgestèlde visiedocuminte.

Dit vereis mèt naome 'n gróndege verbouwing vaan 't 'sociaal domein'. Mèt die verbouwing is door 't veureg bestuur al 'ne start gemaak. Veer wèlle dit krachtig veurtzette.

't Woermake vaan eus ambities vreug 'n ope hajding vaan bestuurders en mètwèrkers riehting eus stad. 't Stadsbestuur moot mie wie 'vaan de stad' ervare weure, vaan de wieke en vaan de inwoeners vaan Mestreech. 't Vereis 'n aander meneer vaan communicere en 'ne mie servicegeriechte bestuurstijl en 'n mie servicegeriechte deensverliening, meh ouch experimentere mèt aanvöllende vörm vaan democratie (via vernuiende vörm vaan burgerparticipatie, zoewie 'ne burgerraod op e specifiek thema) en bove-al mie en ziechbaarder gebedsgeriech wèrke.

Dit alles moot vaanaof 't begin onderdeel zien van 'nen interne cultuuromslag, zoewel bestuurlek es binne eus organisatie. Dat beteikent 't kwalitatiever make van de participatie bij 't vormgeve en oetveure van beleid. Dit vergruut draagvlak en veerkrach.

't Beeje van e thoes aon alle inwoeners van eus stad en besjerming van eus sameleving vreug neve samehaank en verboondeheid (in de stad) ouch um 'ne realistische kiek nao boete (rond de stad). Veur e vitaol en weerbaar Mestreech is kinnes van en nètwerk in de regio, 't land en 't (naobij) boeteland oonmisbaar. Op dit terrein is spraoke van achterstalleg onderhaajd, zoewel in de Nederlandse es in de Euregionaole cónteks. De lobby in de regio, in 't land en in Europa kint en moot beter.

Um dees umvaankrieke taak te kinne volbringe zalle veer eus ambities en verantwoordelekhede in balans mèt de veranderkrach van de intern organisatie zien te bringe. Dat verdeent de stad en dat maag de stad van us verwachte.

Dit alles vertaolt ziech in concrete planne en acties op de volgende terreine:

Veerkrachtege wieke

De veerkrach van de wieke vreug om 'n veur Mestreech innovatieve wijs van wèrke, boebij veer same mèt inwoeners en partnerorganisaties integraol wiekoontwikkelingsplanne goon opstèlle. Neet de regeling koume centraol te stoon, meh de oplossinge. Veer starte in twee nog naoder te bepaole gebede mèt 't slete van e sociaol kontrak, boe-in concrete en meetbaar doele koume te stoon.

Gebedsoontwikkeling

Bouwe doen veer neet allein veur de wins, meh veur de brei welvaart van alle Mestreechtenere. Gebedsoontwikkeling is 'n instrumint veur 't bevordere van leefbaarheid, maotsjappeleke en economische oontwikkeling. In 'n aontal belaankrieke gebede van de stad veurzien veer de koumende jaore groete oontwikkelinge. Dink aon 't ENCI-terrein, Lummel aon de Maos, Belvédère, kwetsbaar buurte en de Maosovers. Wat betröf de middellangen termien wèrke veer wijer aon 't slechte van nog resterende oos-wes-barrières, wie 't spoor.

Veilegheid en leefbaarheid

'n Veileg en leefbaar woenumgeving is 'n kernweerde veur eus inwoeners. Ziechbaar aonwezege en aanspreekbaar wiekgeboonde mètwèrkers, boa's en wiekagente zien daorum belaankriek. Dat beteikent oetbreiing van 't aontal boa's op straat, ouch 's nachs, en 'ne regionaole lobby veur mie pelitiecapaciteit.

Woene

Woene is 'n universeel minserech, daorum wèlle veer draon wèrke tot eus Mestreechs woenaonbod betaalbaar, duurzaam en divers is. Veer faciliterere 't bouwe van studentecampusse en zètte in op 'n beter kwaliteit van sociaol heurwoeninge, mie middeheur en op genóg aonbod in de kouwmerret boebij starters- en seniorewoeninge extra aondach kriege um de doorstruiming te bevordere.

Klimaat en energie

Milieu-doelstèllinge én geopolitieke oontwikkelinge noedzake us um op 'n aontal thema's te avvencere, in samewèrking mèt eus inwoeners, bedrieve, maotsjappeleke partners en kinnesinstèllinge. Die versnelling heet veural betrèkking op 't realisere van oplossinge veur hoegwaterproblematiek van de Maos en häör zijriviere en op aofbouw van eus aofhaankelekhede van fossiel energie. Ouch op 't gebede van mobiliteit make veer kääzes die 't leefklimaat van eus stad aontrèkkeleker make.

Participatie

Ederin moot kinne mètdinke, mètpaote en mètdoen. De liegen opkoms bij de gemeinteraodsverkezinge laote zien wie belaankriek 't is um participatie vaan inwoeners mie te stimulare. De koumende jaore zalle veer denao streve um de kloof tösse gemeente en häör inwoeners te diechte via versjèllende initiatieve op 't gebeed vaan börgerparticipatie. Dat is onder mie de introductie vaan stadsdeilrezjiseurs en stadsdeilwèthawwers roontelum zeve stadsdeile inclusief adequate wèrbudgètte, de vasstèlling vaan 'n participatieverordering en de oetbouw vaan de börgerbegroeting.

Economie en arbeidsmerret

De opgaof veur de koumenden tied is 'n vervlechting tot stand bringe vaan de Mestreechse kinneseeconomie mèt de woenstad, wèrkstad en bezeukersstad die Mestreech is en blijf. Kort gezag; toerisme, maakindustrie, praktisch-opgeleide en inwoeners die mie kanse verdene mote 'ne vaste sjakel weure in de greujende Mestreechse kinneseeconomie. Um dat te bewèrkstèllege is 't cruciaal 't MKB te betrekke. 't Is wijer noedzakelek de band tösse 'kinnes en wiek' te verstèrke en tasbaar te make.

Cultuur

't Is belaankriek tot ederein cultuur moot kinne make en mètmake. Veer zien gruuts op eus volkscultuur, de oontluikende popcultuur, eus opleiinge wie 't conservatorium, de toneelsjaol en de kunsacademie, op al die mekers en professioneel instèllinge die 'n belaankrieke rol speule. Die optèlsom maak tot veer twiede cultuurstad vaan Nederland zien. Veer verstèrke de verbinding tösse amateurs en professionals, veer geve 'nen impuls aon cultuureducatie en stimulare de samewèrking tösse vereininge mèt aander maotsjappeleke organisaties in de buurt. Zoe ondersteune veer de veerkrach vaan inwoeners en wieke.

Sport en bewege

Es stimulans veur de volksgezondheid is sport- en beweegdeilnaome vaan eus inwoeners noedzakelek. Veer creëre in eus openbaar ruimte mie meugelekhede veur speule, bewege, sporte, ziech treffe en ziech verplaatse. Veer zörge same mèt inwoeners en sport- en beweegaonbeejers veur veilig bereikbare en good onderhawwe sport- en speulveurzeninge in de wieke en buurte en faciliteren inwoeners die heiveur zelf 't initiatief wèlle numme. Want neve 't gezondheidsaspek is sport ouch 'ne belaankrieke oontmoetingsfactor en e bindmiddel in de stad en de wiek.

Mestreech en de (Eu)regio

De samewèrking tösse de buurgemeinte en zusterstei moot beter en concreter, mèt naome ouch gezeen projekte wie de Einstein Telescope en 't realisere vaan grenseuversrijend openbaar vervoer. Ouch de watersnoed in juli 2021 tuint tot samewèrking belaankrieker is es oets, deze kier op 't gebeed vaan klimaat, duurzaamheid en energie en 't verstèrke vaan euze gezameleke lobby riehting Den Haag en Breusel. Mestreech moot in al die samewèrkinge de zjuste rol numme: leiend en verbindend.

Onderwies en jätög

'n Belaankrieke ambitie vaan dit college is um twiedeiling te veurkoume. Dat beteikent kansgeliekheid bevordere. Veur dien kanse zouw 't neet oet mage make boeste in de stad gebore bis. Kanse beginne bij onderwies en 't op vreuge leeftied veurkoume vaan achterstande. Kansgeliekheid vreug daoneve um touwgaankelek onderwies veur ederein. Dat beteikent 'n brei sjaalgemeinsjap aon beiskante vaan de Maos.

Bestuur, organisatie en financies

Veer zien devaan doordronge tot 't stadsbestuur mie vanoet samewèrking mèt de inwoeners vörm

en inhaajd mote geve aon de oontwikkeling vaan eus stad. Daobij is 'n stevege gebedsgeriechte wèrkwijjs vaanoet bestuur én organisatie noedzakelek um de verbinding nao wieke en buurte te herstèlle. In dees benadering pas ouch 'nen open dialoog mèt de raod, veurbij traditioneel coalitie-oppositiedinke. Ouch dao gelt: wie kinne veer vaanoet verbinding tot de bèste beslute koume? Doorslaaggevende randveurweerde veur 't welslage vaan de ambities vaan dit college is tot financieel orde op zake gestèld weurt, te beginne in 't sociaol domein en tot veer eus bedrijfsveuring door centralisatie robuuster weite te organisere.

't Volledeg akkoord is trök te vinde via [link](#)

Vertaoling: Veldeke Krink Mestreech (www.veldekemestreech.nl)